

**E-mail: [info@vzs.ba](mailto:info@vzs.ba); [radio@radiosarajevo.ba](mailto:radio@radiosarajevo.ba); [info@slobodna-bosna.ba](mailto:info@slobodna-bosna.ba)**

**PREDMET: Žalba na promovisanje govora mržnje i promovisanje opravdavanja krivičnih djela silovanja i nasilja u porodici putem portala Radio Sarajevo i Slobodna Bosna**

Poštovani/e,

Ovim putem se žalimo na objavljene članke portala <https://www.radiosarajevo.ba/multimedia/video/hit-na-internetu-kako-bosanac-opisuje-danasnje-zene/266862> i [http://www.slobodna-bosna.ba/vijest/55158/sta s ozenit bosanskohercegovacki youtuber rasturio novim video m kojeg je vidjelo milion ljudi video.html](http://www.slobodna-bosna.ba/vijest/55158/sta-s-ozenit-bosanskohercegovacki-youtuber-rasturio-novim-video-m-kojeg-je-vidjelo-milion-ljudi-video.html) u kojim promovišu video s Youtube kanala blogera Amira Hadžića, pod nazivom "DANAŠNJE DJEVOJKE". Žalba se odnosi na govor mržnje koji sadrži objavljeni video i članci kojima se taj video promovise. U videu "DANAŠNJE DJEVOJKE" Amir Hadžić predstavlja ženske osobe kao seksualne objekte, opravdava silovanje, i potiče na nasilje nad ženama.

Amir Hažić započinje govor mržnje tvrdnjom da "obmotane" (pokrivene) djevojke čuvaju moral, a one koje su "razderane, izbušene, probijene, razgolišene" ne mogu biti nazvane "normalnima". Nakon toga izjave u videu se baziraju na vrijeđanju ženskog tijela kako bi ukazao na "poruku" koju žene šalju svojim izgledom, odnosno oblačenjem koje ističe njihove dijelove tijela. "Poruka" koju žene svojim oblačenjem šalju muškarcima, po Amiru Hadžiću, jeste "dođi, uzmi me za ruku, vodi me gdje hoćeš, i radi sa mnom šta hoćeš". Navodi se da je to zapravo "reklama njenog tijela". Žene koje na taj način "reklamiraju" svoje tijelo se opisuju kao "loše supruge, još gore majke", te je sasvim očekivano da je muškarac u takvom braku "degenjeći, nabije boksom, nabije nogom...", čime se otvoreno poziva na nasilje nad ženama. Amir Hadžić također kaže da on nije "nikakav moralista i anđeo", ali da zna šta je normalno, a to su žene koje se "normalno" obuku i dotjeraju. "Naravno da djevojka treba držati do sebe, da ne bude rugafet. Treba dlačurde da siječe, da se dotjeruje, da se miriše, da kad razgovaraš s njom znaš je li pričaš sa ženskom ili s međedom".

Zaključak videa je da djevojke koje su "razderane, izbušene, probijene, razgolišene" ne postižu ono što "misle da postižu", nego stvaraju kontra efekat. Amir Hadžić tvrdi da djevojke misle da ih se smatra "dobrom mačkom", ali ustvari ih smatraju "jeftinom i lahkom, i samo razmatraju međusobno na kafama kako bi te koji: bi l' te na sudoperu, stolu, ili frižideru". Niko od "normalnih" muškaraca takvu ne želi za majku svoje djece, kaže Amir Hadžić. To su žene koje žele "skupe večere, torbe, čizme, mobitele, da joj sve to neko plaća, da svi vide kako ona živi na visokoj nozi". A muškarci su ti koji sve to plaćaju zbog "malo rupe", što ukazuje na objektificiranje ženskog tijela. Amir Hažić opravdava silovanje izjavom "...onda kaže desilo se silovanje... Pa gdje se neće desiti?! Sama provociraš momčiće!"

Portali radiosarajevo.ba i slobodna-bosna.ba ne samo da su prenijeli ovaj video, te samim tim širili govor mržnje i opravdavanje silovanja i nasilja nad ženama, nego su i tekstovima koji su pratili video pohvalili i istakli kao duhovit i relevantan: „Nema sumnje da je osvojio simpatije mnogih. U videu "Današnje djevojke" Amir se osvrće na polugole cure, govori o njihovom pretjeranom šminkanju, push-up grudnjacima, selfiejima, twerkanju, a veći dio videa govori o sponzoršama. (slobodna-bosna.ba)” i “Počevši od pocijepanih pantalona, skupe odjeće i telefona, grudi i istaknute zadnjice, Amir Hadžić je opisao današnje žene. Njegovi snimci često nasmijavaju cijeli region, a sada se pozabavio današnjim trendovima, pa je rekao i kakve žene treba da budu, a kakve su danas. Većina njegovih fanova su se složili s njim, a pogledajte šta je sve ispričao. (radiosarajevo.ba)”

Smatramo da je prenošenjem i promocijom ovog videa prekršen Kodeks za štampu i online medije BiH, te zahtjevamo da se [radipsarajevo.ba](http://radipsarajevo.ba) i [slobodna-bosna.ba](http://slobodna-bosna.ba) ograde od govora mržnje Amira Hadžića u videu kojeg su promovirali na svojim stranicama, te da osude govor mržnje kojim se žene predstavljaju kao seksualni objekti, te opravdava silovanje, i potiče na nasilje nad ženama. Također, zahtjevamo da se portali javno izvinu ženama žrtvama silovanja i nasilja u porodici, zbog promovisanja narativa koji tvrdi da je žena kriva za silovanje, te da žene svojim izgledom i ponašanjem same izazivaju nasilje, fizičko i seksualno, te trebaju da ga očekuju.

Govor mržnje postao je veoma ozbiljno i aktuelno pitanje u Bosni i Hercegovini, a najproblematičniji oblik neprimjerenog izražavanja nalazi se na internetskim portalima i društvenim mrežama. Bosna i Hercegovina je ratificirala sve najvažnije međunarodne akte koji se direktno i indirektno odnose na slobodu izražavanja i zabranu govora mržnje. Europska konvencija o zaštiti ljudskih prava i osnovnih sloboda i njeni protokoli su sastavni dio Ustava Bosne i Hercegovine, direktno se primjenjuju u Bosni i Hercegovini i imaju prioritet nad svim ostalim zakonima, stoga je od iznimne važnosti reagovati i osuditi govor mržnje, kao i bilo koje opravdavanje krivičnih djela.

S poštovanjem,